

REGLUGERÐ

um árstíðabundið verðmiðlunargjald af verði mjólkur til framleiðenda.

1. gr.

Innheimta skal árstíðabundið verðmiðlunargjald af verði mjólkur til framleiðenda og skal tekjum af því varið til að greiða framleiðendum álag á grundvallarverð mjólkur á öðrum árstíma. Gjald þetta skal ekki hafa áhrif á útsöluverð mjólkur til neytenda.

2. gr.

Sé landinu skipt með reglugerð í mjólkursölusvæði samkv. ákvæðum 45. gr. l. nr. 46/1985 sér stjórn hvers sölusvæðis um innheimtu og endurgreiðslu gjaldsins á sínu svæði og er skylt að halda bókhaldi um gjaldið og fjárreiðum aðgreindum frá rekstri afurðastöðva(r) sölusvæðisins.

Hafi landinu ekki verið skipt í sölusvæði fer Framleiðsluráð landbúnaðarins með innheimtu og endurgreiðslu gjaldsins skv. ákvæðum þessarar reglugerðar.

3. gr.

Gjald sem innheimt er skv. 1. gr. skal vera að lágmarki 7,5% af verði mjólkur sem er innvegin í afurðastöð í maímánuði og 12,0% í mánuðunum júní og júlí. Ekkert gjald reiknast í öðrum mánuðum ársins. Gjaldið skal reiknað af því grundvallarverði mjólkur sem verðlagsnefnd búvöru hefur ákveðið á hverjum gjaldtökutíma.

Sá aðili er annast innheimtu og endurgreiðslu gjaldsins getur þó að fenginni staðfestingu landbúnaðarráðherra ákveðið að það gjald sem innheimt er skuli vera allt að 15% verðs og einnig að í stað þess að gjaldtaka fari fram fyrir mjólk innvegna í maí, fari hún fram fyrir mjólk innvegna í ágúst með sömu gjaldtöku að lágmarki í hlutfalli af verði mjólkur. Beiðni þar um skal hafa borist landbúnaðarráðherra eigi síðar en 1. september á því verðlagsári sem gjaldtakan fer fram og ber þeim aðila er heimildina fær þegar að tilkynna framleiðendum innan svæðisins um breytinguna.

4. gr.

Verðmiðlunargjald skv. þessari reglugerð skal innheimt af framleiðendum jafnhliða því að greiðsla mjólkur fer fram sem gjald er tekið af skv. 3. gr. Liggir fyrir samningur milli ríkisstjórnarinnar og Stéttarsambands bænda um magn mjólkur sem hverjum framleiðanda er tryggt fullt verð fyrir, skal verðmiðlunargjald aðeins tekið af því magni mjólkur sem er með fulla verðtryggingu hjá hverjum og einum fyrir sig í þeim mánuði er um ræðir. Hafi áður nefndur samningur ekki verið gerður skal gjald tekið af allri innveginni mjólk í mánuðinum.

5. gr.

Það gjald sem innheimt hefur verið skal endurgreiða framleiðendum sem álag á innvegna mjólk í mánuðunum september til og með febrúar innan sama verðlagsárs og gjaldið er tekið. Fari stjórn sölusvæðis með endurgreiðslu gjaldsins er henni heimilt að fenginni staðfestingu landbúnaðarráðherra að láta endurgreiðsluna ná einungis til mjólkur sem er innvegin í mánuðunum október til og með febrúar eða mánuðunum október til og með mars. Umsókn þar um skal hafa borist landbúnaðarráðherra eigi síðar en 1. september á því verðlagsári sem um ræðir. Sá aðili sem fer með innheimtu og endurgreiðslu gjaldsins

skal við upphaf verðlagsárs gera áætlun um hversu mikið muni innheimtast yfir sumarmánuðina og hversu hátt álag kunnir að koma á verð mjólkur á áður nefndum mánuðum og kynna hana framleiðendum á svæðinu.

6. gr.

Við lok álagningar gjalds fyrir hvern mánuð, skv. 3. gr., skal sá aðili sem með framkvæmdina fer reikna hverju álagt gjald í mánuðinum nemur að meðaltali á lítra mjólkur sem greiðast skal með álagi skv. 5. gr. Það álag sem þannig er fundið á lítra mjólkur skal greiða framleiðendum eigi síðar en með greiðslu fyrir mjólk innvegna í mánuðinum þar á eftir.

7. gr.

Rísi ágreiningur um gjaldskyldu eða önnur atriði er varða reglugerð þessa, sker landbúnaðarráðherra úr þeim ágreiningi.

8. gr.

Brot á ákvæðum þessarar reglugerðar varða refsingu skv. 59. gr. l. nr. 46 27. júní 1985.

9. gr.

Reglugerð þessi er sett samkv. 22. gr. l. nr. 46 27. júní um framleiðslu, verðlagningu og sölu á búvörum, til þess að öðlast þegar gildi og birtist til eftirbreytni öllum þeim sem hlut eiga að máli.

Ákvæði til bráðabirgða.

Á verðlagsárinu 1985/86 skal það gjald sem innheimt er vera 7,5% af verði mjólkur í maímánuði og 12,0% af verði mjólkur í mánuðunum júní og júlí. Á sölusvæði Mjólkursamlags Ísfirðinga skal gjaldið þó vera 12,0% í júní, júlí og ágúst og endurgreiðast á innvegna mjólk í mánuðunum október til og með mars. Að öðru leyti fer um innheimtu og endurgreiðslu gjaldsins á verðlagsárinu eftir ákvæðum reglu í 1.—9. gr. reglugerðarinnar.

Landbúnaðarráðuneytið, 6. júní 1986.

Jón Helgason.

Guðmundur Sigþórsson.

AUGLÝSING

um breyting á gjaldskrá Rafmagnsveitna ríkisins nr. 207/1986.

A. 4. Sumarbústaðanotkun.

Orkugjald lækki úr 2,16 kr./kWh í 1,97 kr./kWh

Gjaldskrárbreyting þessi, sem sett er samkvæmt orkulögum nr. 58 29. apríl 1967 staðfestist hér með til að öðlast gildi 1. júní 1986 og birtist til eftirbreytni öllum sem hlut eiga að máli.

Iðnaðarráðuneytið, 3. júní 1986.

Albert Guðmundsson.

Guðrún Skúladóttir.